

periculum et tocius populi scandalum per seculum evagando precipit capitulum generale, quod ad carcerem revertatur, alioquin si redire noluerit, capiatur carceri mancipandus, invocato ad hoc, si necesse fuerit, brachio seculari et nichilominus idem Waltherus per omnes ecclesias Basiliensis diocesis procuretur excommunicari singulis diebus, donec discipline ordinis totaliter se submittat.

1300 . . . Ut futuris periculis occasio precludatur et dampnis imminentibus provido consilio occurratur, omnibus abbatibus, prioribus, cellerariis et bursariis ordinis in regno Francie constitutis sub pena deposicionis, districcione qua potest, precipit capitulum generale, ut ipsi infra instantem beati Johannis Baptiste pro debitis in ordine pro ipsis negociis et domini regis Francie karitativo subsidio iam contractis et in posterum necessario contrahendis domino Cysterciensi, ut ipsius mandato apud Parysius, quantum pro una decima solvere constituerint, solvere non obmittant. De aliis vero, qui sunt extra dictum regnum, domino Cysterciensi et quatuor primis abbatibus committit idem generale capitulum, ut in predictis negociis possint eis auctoritate dicti capituli certam contribucionem imponere loco et tempore quibus viderint oportunum. Abbates vero, priores, cellerarii et bursarii, qui non solverint terminis assignatis, ipso facto depositos se noverint esse auctoritate capituli generalis.

1302. Item, cum pie voluntatis peticio sit favore benivolo proseguenda, maxime ubi cultus divinus ampliatur, ad petitionem illustris regis Bohemie¹ generale capitulum ordinavit et diffinivit, quod in vigilia beati Mychaelis annis singulis commemoracio fiat de beato Wenzelao martyre et non pontifice cum una missa per ordinem universum. . . .

1303 . . . Item, cum universo ordini a sanctissimo patre domino Bonifacio summo pontifice sit indultum, ut terras nostras cultas vel non cultas, non solvendo de eis decimas, possimus tradere colonis secularibus ad colendum, de quibus nullus alius decimas vel primicias percepit, prout in ipsius privilegio plenius continetur, ex quo indulto speramus bona non modica ordini in posterum eventura: generale capitulum universis personis ordinis inhibet, ne hoc clam vel palam per se vel per alias deduci impediunt

1) Wenceslai II.